



嶺海續聞

猺

本五溪槃瓠之後自荆南以來皆有之隨谿
尚群處而生亦獠獠類也椎髻跣足有採捕
無賦役各以遠近為伍不屬于官嶺海間號
曰山民又呼為白衣山子按胎髮不薙除長
大而無櫛篦不累
中蓬垢淨獠
是為椎髻

獠

依山林而居無酋長版籍年甲姓名以射為

生凡蟲豸能蠕動者皆食之惟有事力者曰
郎火餘但稱火舊傳有飛頭鑿齒鼻飲白衫
花面之屬二十一種今蕃衍有百種云

黎

海南四郡隰土蠻也隰中有黎毋山諸蠻環
居四旁號黎人山極高常在霧靄中又晴海
氛清廓時或見翠尖浮半空云人皆椎髻跣
足婦人繡面加銅環耳墜垂肩多王符為姓
供賦役者為熟黎不供者為生黎又名屯音

人

蛋

海上水居蠻也以舟楫為家捕魚為業且生
食之入水能視見水色則知龍故曰龍戶齊
民目為蛋家合浦珠池蚌蛤惟蛋能沒水探
取傍人以繩繫其腰繩動搖則引而上先煮
蠶衲極熱出水急覆之不則寒慄而死或遇
大魚蛟鼉諸海怪為鬚鬣所觸往往潰腹折
肢人見血一縷浮水面知蛋死矣

長人

河池州近山地牧童十餘人聚而嬉戲或歌或舞儻如也忽見山半一人約長二丈面橫三尺餘皆倍之被髮烏喙背有双肉翅俯觀群童為樂嘻然而笑聲振林樾少頃舌垂長過腹群童見而駭之良久乃去不知何物又不害群童噫乃夷方別一種人哉

盧亭

盧循遺種

盧亭人屬胎生黃睛短髮出沒海洋以魚鰕

為食惟雄者後有小尾長寸餘其牝牡則人也語侏僂不可辯蛋人諳其性得其小者育之衣以樹皮木葉長令捕魚採珠取珊瑚極便捷其性專慾與山狔等乃身腥穢不可近嘉靖間備倭黑孟陽捕海寇得一於舟中呈解粵省因食火食死焉識者謂為盧亭無乃鮫人之類也乎

能伏水一二月正德間香山漁者曾獲一人

珊瑚

珊瑚產西南南海相傳濱海人織鐵網沉之海

中必久而後生有長寸餘者有高尺許者融
結鮮紅入中國製為器飾其價翔矣或曰以
鐵網取之有高至三尺者西陽雜俎載漢積

越王趙陀所獻號為烽火樹夜有光彩常似
一丈二尺一本三柯有四百六十二條是南
欲燃晉太康三年王愷石崇競富愷嘗以珊
瑚樹高二尺許者示崇崇便以如意碎之愷
以為疾已之寶崇曰不足為恨今還卿令左
右取其家珊瑚樹高三四尺者六七株如愷
者甚衆集異記光武時南海獻珊瑚婦人
帝命植於殿前謂之女珊瑚柯葉茂盛

毒瑁

玳瑁形似龜鼈背甲十二片黑白斑文相錯

以成其邊欄闕嚙如鋸齒無足而有四鬣前
長後短其上皆有鱗甲以四鬣擢水而行海

人養以鹽水飼以小鱗以俟取用海槎餘錄

海洋深處其大者不可得小者時時有之狀
如龜鼈背負十二葉有自然文藻取用時必
倒懸其身用器盛滾醋潑之逐片
應手而下製為器皿其價頗翔

金剛石

產深水中人不可取以肉投澗底有鳥如水

鳧食其肉糞中得之名金剛鑽亦寶石也真

中有婆羅僧言得佛齒所擊前無堅物觀者
雲聚傳奕謂其子曰是非佛齒吾聞金剛石

至堅物莫能敵惟羚羊角可破汝可往試之
應手而碎觀者疑釋至今理玉石者用之

七星珠

合浦村有老嫗晨往海濱汲水獲巨蚌剖之
得一大珠歸而藏之絮中夜輒飛去及曉復
還嫗懼或失以火煮之至夜有光燭天鄰
競往赴之見光自釜出乃珠也明日聞之官
珠如彈丸狀類水晶其中隱隱露北辰之象
經煮色黯郡不敢貢南越志端溪俚岑班入
山遇一寶珠徑五寸取
還夜光明燭國俚人懼以
火燒之雖小損猶照一室

龍涎香

南巫里洋之中有龍涎嶼浮灩海面波激雲
騰當春明景和群龍來集於上交戲而遺涎
沫夷人駕獨木舟登嶼採之歸而市之番舶
其香初若脂膠黑黃色聞之頗覺魚腥然能
收斂腦麝清氣雖經數十年不變以少許和
香焚之則翠烟浮空芬芳凝結不散番中每
香壹兩准金錢十二枚價甚翔矣按香有三
品一曰汎
水輕浮水面善水者伺龍出沒隨而取之
入香用二日滲沙凝積多年

中三日魚食為魚所食散糞於沙磧俱不堪
入香其色有褐黑色者採在水也褐白色者
採在山也諸香中惟龍涎最難得乃番中禁
權之物當其採時或遇風濤則人俱下海一
手附舟一手挹水
方得抵岸噫險哉

珠熟

珠出合浦海中有珠池蛋戶投水採蚌取之
歲有豐耗多得謂之珠熟相傳海底有處所
如城郭大蚌居其中有怪物守之不可近蚌
之細碎延於外者始得而採北戶錄西南海
有羅子國採珠
人盛以革囊止露兩手腰絙石墜入海手取
蚌并泥沙貯滿囊中撼絙舟人引出遇惡蟲

以時嘆之即去
然往往往有死者

紫綃

紫綃帳得於南海溪洞中酋帥蓋鮫綃之類
也輕踈而薄如無所礙雖屬凝冬而風不能
入盛暑則涼自至其色隱隱焉不知其帳也
亦奇物哉搜神記南海之外有鮫人水居如
魚不廢緝織其人能泣珠所謂紫
綃或其
織也

蠻鼓

狸獠鑄銅為鼓相傳有是鼓方為都老群情

推服每有攻擊輒鳴此鼓以聚眾頗自貴重

革形金質中空無底鈕垂四懸款製奇古隱

隱皆科斗八卦紋周遭蹲蝦蟆十二唐僖宗

朝鄭綰鎮番禺高州守林霽獻之初因村兒

聞鳴蛙之變得于蠻酋大塚中今南海廟尚

存惟蝦蟆殘缺聞正統間海寇謀取將出門

鈕斷得不去扣之猶錡然有聲亦神物也

蠻溪叢笑蠻地多古銅有銅柱馬希範江水中掘

得銅鼓如大鍾長筒三十六乳重百餘筋其

紋環以甲士中空無底虞衡志銅鼓古蠻人

所用南邊土中往往有掘得者相傳為馬伏

波所遺其製如坐墩而空其下滿鼓皆細花

紋極工緻四角有小蟾蜍兩人昇行以手搏

之聲全似鞞鼓瓊州志永樂中起黎兵挖引

多輝溪水得一鼓長三尺面圓五尺凸二寸

許沿邊皆科斗各脚線抵臍束腰麥尾擊之

聲如鵝鵲聞數里。隆慶間大征九絲撫臣

獲銅鼓數具以獻時江陵當國欲納於太廟

石梅

生海中一叢數枝橫斜瘦硬形色頗似枯梅

雖巧工造作所不能及根所附著如覆菌或

云本質為海水所化如石蟹石燕石蝦之類

大抵皆海水融結而成久之亦化為石矣俗呼為海枇杷者是也

青螺

狀類田螺其大如拳搨磨去其麤皮有翡翠色琢為酒杯又有鸚鵡螺狀如蝸牛頭淡青色身白色周遭間赤色數稜磨治出其精彩亦琢為杯鑲以黃金頭頸足翅宛然亦可玩也

石鷲

石鷲本海中水沫融結成形歲月既深遂氣化為石蓋陰精也當霧雨瀰漫亦能行能飛許渾詩石燕拂雲晴亦雨謂此出牂牁江今海南亦有之治產難虞衡志云石蟹生海南形似真蟹乃海沫所化治癰腫醋磨碗碟中尚能蠕動又有石蝦亦其類也亦奇矣

人面子

子大如青梅核如人面兩目鼻口皆具肉其酸宜蜜核中仁白如榛松點茶頗清

椰子

木身葉悉類椶櫚子生葉間一穗數枚皮即大腹堪入藥子殼可為器子中瓢如玉瓢中漿如飴伽藍記所謂酒樹是也子有人為六稜者製酒杯佳愈小而直愈昂矣

枕榔

木直如杉又類椶櫚有節似大竹一幹挺上無旁枝高數丈開花數十穗綠色釀木皮出麵伽藍記所謂麵木是也心可為灸近以其

木鋸為棋罐香盒諸器蔚有斑紋可愛

猪肥子

附木蔓生葉類土瓜花于春而秋實之狀似猪腰子差小殼堅有斑斕色去皮炙之多脂味如肉可食土人呼為猪肥子云余謂酒樹椰也麵木枕榔也并猪肥名曰肉果可乎三者皆產炎嶠亦一奇也

羅望子

殼長一二寸形如肥皂又類刀莖色丹內有

三四實熟之味如栗土人呼為水浪子望浪聲相近蓋誤云

波羅

木高數丈不花而實如瓜瓠外膚礪砢像佛髻實中子大於龍眼可蜜熟之味與栗同相傳種從天竺來達摩弟達奚司空携植中國云

菩提

梁天監元年智藥禪師自天竺來手植菩提

一株于王園寺後六祖以菩提悟性傳衣鉢遂祝髮於此今為光孝寺云樹至今存其徑合圍虬然蒼古葉似楓而大冬夏菁葱僧取其葉漚之質輕如蟬翼好事者製為燈篝火于中晶瑩洞達視之若無有焉頗得禪宗清澹之趣

紅蕉

葉類蘆箬心中抽條條端發花葉數層如齒齒日拆一二葉色鮮紅每花瓣首有翠綠一

點尤為可愛春夏開至歲寒猶芳俗名美人

蕉是也又有一種根出土處特肥如膽餅名

抽幹長數尺節節有花花褪葉根有實去皮

取肉軟如綠柿味甘性涼或以飼小兒名蕉子抽其絲可為布

象

月山叢談象性最靈皆來自安南過水則浮

以鼻向天若植桅然其候以秋七八月至食

人禾稻村民設象囿以誘之其家預掘坑以

待象囿引野象陷坑中飢三四日為假人以

篙懸下乘坐初時大躍漸以草投之久則馴

狎然後坎地出而騎之其牝牡相交在水傍

泥淖中藉以樹葉如人道若人見則羞起逐

之人須環嶺走乃得逸不爾操之成糜矣此

錄雷州產黑象牙小而紅土人捕之爭食其

鼻云肥脆堪為炙蓋象身有十二肖肉惟鼻

小龍

羅池人計巡檢山居嘗出行獲一巨卵使鷄

代之乃產一蛇長不盈尺四足蒼色鱗甲宛

然昂首步行若獸家人以米汁豢之數月漸大好飲生血行止隨人甚為馴擾呼為小龍因放之溪潭數年後一夕風雷暴作雲霧中有蒼龍自潭起長數百尺乘空而去

大龜

政和中路公弼奉使三韓舟行海中忽見黑山湧起波間山頂有光如兩日並出官吏大恐舟師曰此大龜出游兩日者其雙目也當作法禳之良久乃沒

宋太宗時萬州獻六眸龜洪武四年暹羅國進

六足龜皆異物也

五色龜

番禺鹿步都之小坑村去海不遠而有巖巖下有石石下有水深三尺許聚亂石為池上有一石徑約五尺可坐卧下瞰池水水中有龜大小計二三十枚青黃紅白交錯於澄波遊人至投以餅餌其大者率群龜趨食之馴擾可愛或萌欲取心即瞥然不見矣

北戶錄云粵中

有金龜甲蟲也五六月生于草蔓上大如榆莢細視之如金貼龜背行則成雙其蟲死則

金色隨滅
如螢火然

蚺蛇

蚺蛇大如柱長稱之其膽入藥腊其皮可以
鞞鼓常出逐鹿食之蠻人數輩滿頭插花趨
赴蛇蛇喜花必駐視漸近競拊其首大呼紅
娘子蛇益俛不動壯士以刀斫其首亟奔散
遠伺之有頃蛇覺奮迅騰擲小木盡拔力竭
乃斃數十人昇之以歸一村咸飫蛇北戶錄蚺
十餘丈圍可七八尺多在樹上麀鹿過者吸
而吞之至鹿消即纏大樹上出其骨角乃不

復動夷人伺之以竹簽殺之取其膽也異物
志蚺蛇牙長六七寸土人尤重之云辟不
利速行一拔直于山為蚺蛇所蟠亟聚眾擊
之蛇舍之去婦人尚有微氣灌以雄黃稍蘇
竟毒發而死蓋蚺蛇性淫見婦人裏衣輒卧
其上故一人得而醢之肉白味佳能解諸風毒
膽有二一真一水被逐急自裂水膽與人入
藥無効以真膽著男陰即消縮不舉或以葛
藤尺許擊其首伏不敢動貫其鼻牽之即行
不知物之相制乃如此

蝮蛇

蝮蛇產固戍海百里內深秋浮於水面漁人
網得之蝮頭筋頸腹臂尾鰻口有毒涎齒利

傷人膏肉温補能療諸風或入藥或釀酒或
鬱而囊懸酒甕中服之說者謂功不在白花
蛇下

紅蛇

雷州對岸見群小兒簇二蛇各長丈餘一
如孔雀尾鱗色金翠奪目一真紅色鮮明若
血又有十餘頭白蛇前後相次若導從然俱
入一榕藤竅內竟不復出

山獺

出蠻中溪崗俗傳為補助要藥獺性淫毒山
中有此物凡牝獸皆遠遁獺無偶抱木而枯
若人中藥箭磨其骨少許傳之立消其價甚
翔得殺死者尤効

風生獸

炎洲在南海中地產風生獸似豹青色大如
狸張網取之焚之不毀毛亦不焦以石菖蒲
塞其鼻即死焉取其腦和菊花服之益壽又
有火林山生火光獸大如鼠毛長三四寸或

鳥之淫者
歌之淫者
唐之武
白鶴也金
之海陵獺
也
無偶則
抱而枯何
無尾生倚
橋而沒也

赤或白晦夜有光取其毛緝以為布所謂火浣布是也衣污以火燒之振去風垢潔淨如

新海西富浪國產食火鳥駝蹄
蒼色鼓翅而行高丈餘食火

山鳳

狀如鵞鴈嘴如鳳巢深林中伏卯時雄者以木枝雜桃膠封其雌于巢獨留一竅雄飛求食以飼之子成即發封不成則窒竅殺之亦物之異者與前所記山鳳同而補其未備

孔雀

羅州山中多孔雀雄者生三年有小尾五年成大尾春生秋凋與花萼俱榮衰捕者候雨甚往擒之尾霑雨重不能高翔且惜尾恐傷不復騫也雖馴畜頗久見羨婦人衣服華麗必妬而啄之芳時羨景聞管絃笙歌必舒張翹尾眈眈而舞土人欲取其尾持刀隱於叢林伺過急斲不則回首一顧金翠無復光彩

矣虞衡志孔雀生高山喬木之上人探其雛
育之喜卧沙中以沙自浴响响甚適雄者
尾長數尺生三年尾始成歲一脫尾春夏復
生羽不可近能損目人以猪腸及生菜飼之

惟不食松

鱷魚

鱷魚如鼉而喙長半其身鋸其齒有四足如獸行尾有三鈎極利見鹿豕即以尾戟之以食生卵甚多或為魚為鼉其為鱷不過一二大者如船占城恃之以決訟昌黎為文遣之則一夜率種類西徙六十里蓋物之暴而靈者

劍鯊

海鯊有變為虎者具見前說又有一種劍鯊俗呼為鋸鯊云其大者鼻衝長丈餘濶尺許黃黑色其直似劍其旁排列戟刺捷業如鋸齒然力能破舟裂網橫行海中群魚遠避稍不及即磔而食之莫敢櫻其衝也

緋猿

高涼青山鎮其山多猿有黃緋者緋者絕大毛彩煥鮮亦奇獸也又傳有青白玄黃能伏鼠善啼其音淒入肝脾方知當一部鼓吹豈

獨轟聲然哉

長鳴雞

西京雜記成帝時交趾越裳進長鳴雞長距
善鬪伺晨雞即下漏驗之晷刻無差每鳴則
食頃不絕沈懷遠讚曰翠冠續莒碧距麗陳
就昏別夕望旭警晨

大魚

有人至補陀山望見海中數十里外有旌旗
如軍行數萬騎者湧躍東下其人駭之舟師

曰此大魚耳旌旗狀者其鱗鬣也須臾稍近

山石為之震動久之獲寧

西京雜記有人汎

漂不能制隨風浪莫知所之一日夜得至一
孤洲共侶懽然下石植纜登洲晨炊未熟
而洲沒死者十餘人在船者亟斷其纜船復
漂蕩向者孤洲乃大魚也揚鬣吐浪而去疾
如風雲釋氏書謂海中有魚其大如山背產
大樹業風鼓撼痛苦難禁宋史載罽賓國天
神祠前有一魚骨竅中可通騎馬往來泛海
錄云洋中之物莫巨于魚其背鬣矗然山立
彌亘不盡所經海波兩拆不合者數日山菴
雜錄云有魚從海中過揚鬣露脊投南而行
凡四日夜始盡其身乃知
莊子千里之鯤非寓言也

番車魚

海槎餘錄載昌化屬邑俄海洋中有二大魚
遊戲水面決起烟波中約長數丈離而復合
者數四每一跳躍聲震里許土人曰此番車
魚也間歲一至蓋交感生育之意耳今中州
藥肆中懸大魚骨乃其脊骨云

風狸

狀似黃猿食蜘蛛晝則拳曲如蛭遇風則飛
行空中其溺及乳汁治大風疾奇効

紅蟹

儋州出紅蟹大小殼上多作十二點臙脂色
其殼與虎蟹堪作疊子一名蛻音詭廣雅云雄
曰娘蠃雌曰博帶抱朴子曰山中稱為無腸
公子古今註云小蟹一名長鄉廣志云鋪音脯
小蟹大如錢又蟹奴如榆莢在螭腹中生死
不相離山海經載千里蟹洞冥記有貢百足
蟹長九尺四螯

蛤蚧

首如蟾蜍背綠色上有黃斑點若古錦文長

尺餘尾絕短其族則守宮蜥蜴蝦蟇多居古木竅間自呼其名聲頗大又有名十二時者自旦至暮變十二色亦其類也齧之傷人

瓊蛞

瓊蛞一名沙螺好事者以其甘美細嫩又名西施舌云產於海類蛭而差大與蟹合體共生當潮長時腹中各出一蟹僅如榆莢螯足俱全散食于沙汭飽則仍歸雖縱橫千百無一誤入他腹者蟹或不歸瓊蛞則餒而槁矣

然亦有無蟹而瓊蛞未嘗不生理不可詰郭景純江賦瓊蛞腹蟹類說蠣殼中有小蟹名蠣奴皆可謂體物之妙矣

海粉

海中有物若水母形小而圓無頭足其色灰隨潮往來飽則脂漫至淺沙散粉從後竅溢出若蚕之吐絲勻停柔細狀類米粉初浮於水久則糾結於沙魚人拾而陰乾市為海粉云腹空復入深水化去不知所之

海中又有石髮纖長

如絲

饒燈

天寶遺事南海有魚多脂束以為油點燭紡

績則暗照宴樂則明佛書謂之饒燈或云懶

嬾所化豈其然乎又谿崗間有獸名懶婦當七八月禾熟時群來揉食

土人患之度所經行處交置機罝織作之具懶婦見之宵避與此相類并附之

龍蝦

水經注晉滕修為廣州刺史其鄉人語修蝦

鬚有長尺許者修不以為然其人至東海取

蝦鬚長三四尺者示修修始信厚遣之余近

見蝦形甚雄赤色突目鬚甲猗然土人取其

殼懸之其猶龍乎故曰龍蝦北戶錄潮州出紅蝦大者長二尺

土人多理為杯王子年拾遺大蝦長一尺

鬚可為簪洞冥記載有蝦鬚杖爾雅有鱣蝦

出海中長二三丈游行則豎其鬚高于水面鬚長數尺可為簾

南越志海中有文魮鳴似磬鳥頭魚尾而生

玉海中多朱鼈狀如肺四眼六足而吐珠

龜曆鰲光

唐堯之世越裳獻千歲神龜方三尺餘背上皆科斗書有五行八卦二十四氣記開闢以來帝令錄之謂之龜曆于頓在南海夜忽曉如日初出移時復晦後海客言某日夜海中大金鰲浮出目光照耀如白晝與其日正同方知鰲光

蚊母扇

新州有鳥類青鯢嘴大常在池塘間捕魚為食每作一聲則蚊子群出其口矣廣志云蚊

毋此鳥吐出蚊也其翅堪為扇揮之可以辟蚊

維摩經

宋呂端奉使朝鮮過海洋祝神曰回日無虞當以金書維摩經為謝比回忘之風濤大作遂取經投之聞絲竹之聲起於舟下音韻清

揚非人間比經沉隱隱而去

冷齋夜話王榮老嘗宦觀州渡

江阻風七日父老曰公舟中必有奇物此江神極靈當獻之可濟也若以黃塵尾獻之風如故又以端石硯獻之風愈作夜卧自思有黃魯直書帝應物滁州西澗詩扇持以獻之

少頃水天相映如展鏡南風徐來帆一鉤而
濟觀江且然况東海為龍宮寶藏之所豈無
神以司之維摩經之取
非誣也然其事亦奇矣

梅花夢

開皇中趙師雄遷羅浮一日醉遊憇于麓之
林舍俄見一女澹妝素裳冰肌玉骨逍遙焉
于時月色熹微雪光掩映真天人也師雄訝
之與之語祇覺言詞超俗芳氣襲人無何有
一綠衣童來笑詠婆娑亦有意態久之清寒
漸播醒然起視乃在梅花樹下上有翠羽啾

嘈已而月落參橫不勝惆悵

遊仙枕

開元中海國進枕一具色類瑪瑙溫潤如玉
其製甚樸雅若枕之則十洲三島四海五湖
舉在目前恍疑身之與遊也玄宗愛之自名
為遊仙枕

記事珠

燕公張說為相時有海商售珠一顆紺色有
光名記事珠或有遺忘以手持弄此珠便覺

心神開悟事無鉅細豁然通明燕公寶之惠
天馬山每歲當大比夜有驪珠如斗瑩然光
彩謂之驪光視其多寡占舉子之名數又有
賈胡自異域負其國之鎮珠逃至五羊國人
載金寶贖之以歸比至中途珠復走還徑入
石下不出至今此石往往
有光夜發疑即走珠之祥

龍角釵

大曆中林邑獻龍角釵二枚類玉而紺色上
刻蛟龍之形巧麗精奇非人工所製上以賜
獨孤妃一日與妃同遊龍舟池有紫雲自釵
上生俄滿舟楫上亟命置之掌中竟化二龍
而去

樹兒

大食國中有一方石石上有樹幹赤葉青枝
生小兒長六七寸見人皆笑動其手脚若著
樹枝其使摘取一枝兒即槁死

人異

昔有波斯入粵相古墓有寶氣乃謁墓鄰以
錢十千市之比發而棺衾肌肉俱銷惟心堅
類石鋸開見山水青碧秀麗如畫傍有一女

艷妝凭欄凝眸垂睇蓋此女生時有愛山之癖朝夕吐吞清氣故能融結如此亦異矣哉

土怪

夷堅志鄭安恭為肇慶守有直更卒每夜見城上亭中火光往視之乃十餘人聚賭卒戲伸手乞錢諸人爭與明日辨之真銅錢也夜復如是所積甚多會庫失錢并銀或疑卒近多妄費試擒之具道所以鄭意必土偶為祟乃押卒使人徧索至一廟中有土偶狀貌類

所見者碎之腹中或銀或錢合此卒用過之

數相符盡毀其怪遂息

雷州府誌舊州治前立石人十二

兩傍忽一夜守宿軍聞人爭博聲趨視乃石人也次早聞于官郡守閱視庫藏封輪宛然而所失錢與所得錢數無差命分散石人其怪遂止二事相類并附之



